

## إصرار

لسه الدنيا مليانة خير  
جوانا ساكن حلم كبير  
أيوه بنحلم يوم حنطير  
نوصل أبعد مدى ف الكون..  
ليه أحلامنا متحققش  
ليه لمنانا منوصلش  
لو من جوانا منيأسش  
كل اللي بنحلم بيه حيكون..  
خلي جوانا الأمل  
نوصل حلمنا بالعمل  
تحقيق الحلم محتمل  
حتى ولو غيرنا قال ده جنون..

اعمل خير وارميه البحر  
خلي إيمانك يملك صبر  
عمر الشر ما ينهي الشر  
بس طريق الخير مضمون..  
وإياك تضعف وقت الجد  
وإياك ترفض تساعد حد  
احفظ عهدك صون الوعد  
حتى ولو غيرك بيخون..